

忠

雅

堂

文

集

忠雅堂文集卷十二

詩十二

鉛山 蔣士銓 心餘

四月二十日出都口占

髀肉潛生欲自憐
出門西向舊愁蠲
八年乍見官程柳
不覺攀條一泣然

宿單青咳原司馬署齋二首

中夜河聲雜樹聲
醉看涼月轉南榮
置身宛在山林裏
雲壑風濤枕上鳴

太平兵卒戍伊犁
列幕平沙息鼓鼙
一道夜營人語寂
月中征馬不聞嘶

盧溝橋二首

桑欲乾時水濁渾
銀濤一線玉龍奔
驚風疾卷花如雪
想見當

年萬馬屯

垂虹千尺駕靈鼉回首金元往事過設險天然成帶礪百靈于此護山河

樂毅故里

黃金臺成三士至辛行雖來不如毅將軍在趙已存燕武靈久
易河東地登壇大合五國兵報仇連下七十城齊滑無道國人
怨破竹之勢何能爭兩邑難攻莒卽墨田單守之不可克功成
去作望諸君老將誰憐舊昌國反間玩弄無人知剽降伐矧邪
稍遲火牛一出騎劫死貽書報書皆可悲乘危立功享茅土戰
國人材紛可數夏侯泰初強解事妄以燕人比湯武嗚呼召公
遺澤九百年子孫仇怨相鉤連但憑蘇代堪亡國更用荊軻遂
滅燕

督亢陂雜咏三首

沃美曾勞寫地圖
樊將軍死亦何辜
謀臣義士同歸盡
存國嗟無箇大夫

蔡澤功名目已瞋
荆通雋永說誰聽
不知世有盧郎采
歸臥樓桑注水經

灼艾陰橫虎視眸
太原終老懼難留
一時父子同兒戲
竟割燕雲十六州

樓桑邨

童童羽葆五丈垂
桑陰下覆東南籬
兒嬉便欲作天子
妄語滅門須戒之
領州作相起復仆
妻子流離極憊憊
閉門荷鋤種蕪菁
誰識中山靖王後
可憐馬躍檀溪前
聞雷豈必心茫然
存孤不忍負劉表
娶婦且復依孫權
天心屬操可知矣
諸葛關張相

繼死永安宮裏事如何五丈原邊恨難已枌榆何處求新豐桑
女采桑攜竹籠前邨指點桓侯廟祭祀君臣伏臘同

定興有懷介子先生二首

桑榆翳翳上初陽土潤泉甘美蔭長不識杏壇花底路令人低
首讀書堂

咸陽昨寄弄璋書閒就鄉人問舊居指說彥方三畝宅年時佳
氣已充間

安肅令謝慎庭

昌言

留宿古遂書院二首

善氣油油四境和都人士更解絃歌儒生事業循良傳得力陳
編不在多

卓午停車叩縣門談經席上笑言溫人閒滋味都嘗遍來就先
生齧菜根

荊軻里

匹夫之勇一人敵蓋聶心輕句踐叱博徒爭道亦何爲早識荆
卿無劒術高臺置酒美人舞何以酬知心實苦人頭七首兩俱
得易水歌成聲激楚壯士不還奚足云太子弗若衛成君狗屠
變姓且瞋目置鉛筑內誰殷勤噫噦吁博浪之椎難中彼天意
未終空復爾華陰道上鬼遮人纔報明年祖龍死

保定游古蓮花池

池是張柔鑿當年供冶遊流傳絃誦地尺五帝王州上谷輿圖
壯西巡警蹕留迎鑾民躍躍敷政吏優優引水憑千鍾移
山遣萬牛縈梯通閭苑拓沼貯瀛洲掩豁坡陀轉逶迤閣道週
飛廊橫疊帶短瀑注縣旒竹樹南東畝簾櫳上下樓龕雲陰洞
闕虹彩畫梁浮出入迷還到攀躋眩復休亭軒幾方丈臺殿百

盧舟柳幔雙隄合蓮衣一鏡收驚拳酣午夢魚戲洽天游舞鶴
斜窺渚飛花密泛溝參禪幢蕊笑習射羽星流

御墨鐫靈壁祥煙滿上頭省方遵典禮行樂奉

長秋島石仇池比荷風曲院侔神仙如可致寧復慕丹邱

郭隗里

垂鞭倚羸驂言尋郭公里慨然獻其身求賢自隗始邈矣黃金
臺誰爲薦奇士朽骨苟可售駿馬期速死樂君用未竟開乘何
足齒俯仰傷予心悲風颯然起

方順橋小憩夏叟

棟

樂志園二首

土室三弓屋柴扉半畝園居鄉能樂志守拙亦忘言林翠浸魚
沼河聲入井甬鄰翁提甕過時有輶轡喧

傳說華封叟居然拜

至尊八句稱伉儷五代看兒孫碑記存天籟牆詩上薜痕鄉閭
薰德久應喚善人邨

拱辰鎮光武故城

弟好耕耘兄好俠見大敵勇小敵怯白衣老者爾何來冰合滹
沱須早涉誰驅猛獸巨無霸一戰昆陽震天下傳說長安赤伏
符佳氣曾飛濟陽舍火德中興四七際白水真人銅馬帝以柔
治世推赤心王莽奸雄終罔濟嫗呼文叔比周宣不異歌風置
酒年漢代威儀欣可見岐陽石鼓可重鐫

紀信

滎陽女子出門東黃屋輕投烈燄中看到韓彭盡誅醢始知一
死泰山同

魏鄭公祠

嶢嶢者難強皓皓者易汙舜目爲書生顏叱爲老儒煌煌直諍
詞一德君臣孚因事則納誨每曰貞觀初良臣荷美名忠臣嬰
禍屠古訓戒面從後言心可誅疎慢益嫵媚有此諫大夫元齡
後一人豈遜諸葛徒篋藏二百奏屏列十漸書如何人鑑亡積
羽沈舳艫停婚且仆碑軍還始躊躇嗟哉君臣際終始堪長吁
強諫守史職遺直貽孫墓下馬指曲城公祠久荒蕪弔公公不
聞我懷空鬱紆

喜晤晉州周宜亭刺史二首

策馬來觀政油然父老歡投金誰破戒鬻產自當官訟解加刑
少民和學猛難每聞庭鞫語吾亦涕闌干
退食下簾旌相依一短檠牀頭書爛漫襟上墨從橫寡嗜能勤
學同功每避名尙留絲竹在不廢浩歌聲

同年劉翦軒

謫青

進士紫綬

緋青

參戎招飲

數株喬木百年廬挂壁弓刀插架書門榜雙題文武第鐙筵同
坐水雲居碧梧翠竹兒孫並鴻爪春泥聚散如建業水清吾去
飲輸君飽食武昌魚

李左車

敗將不可以言勇亡虜不足與圖存井陘空壁立漢幟可憐儒
者成安君生得廣武釋乃縛虞亡秦霸公其倫愚者之慮指諸
掌燕齊坐致如公云假王眞王亦何有蒯通武涉空多口神龍
之尾豈可見左車爾是張良偶

馮唐墓

頗牧不能用豈必思鉅鹿謫諫語實慙魏尙于是復賞罰失輕
重文吏且拘束閫外智莫盡李齊亦將僂晚達爲楚相竊歎年

命促九十舉賢良何以報推轂

荀卿

諸君尙游談荀卿頗聞道言性雖未醇緒論亦精奧手訂禮樂
書漢儒藉編校相秦逢君惡豈盡出師教世無子與氏誰復敢
輕誦紛紛攻異端奚足與相較

平原君

璧者先求殺美人李同毛遂乃呈身諸君食客知多少卻要如
姬助卻秦

隆平晤袁雨辰

次漢

邑令書縣齋壁二首

入境民風古登堂吏事修宰官清似佛衙舍澹於秋自卻妻孥
累民知父母謀公餘愛枯坐讀罷一登樓

原是一書生蕭然木榻橫斷齋偕子弟縛架比柴荆官潔嚴私

謁民飢感再生那知同學者名宦獨先成

孔穎達墓下作

老師宿儒遭刺客文學之途何偏仄三世司業爲經師時人亦
復稱美之以謙訓君太宗許以法養蒙太子侮乳媼焉知事君
義儒者殺身期有補君不見顏祕書仕宦不進空著書闔門謝
客負初志巾帔蕭散游林墟又不見陸德明世充聘之不肯行
先生畢世享令聞馬鄭之徒功豈遜文人坎壈死不免尙有沙
門馬嘉運

新樂縣泛水同周宜亭刺史作

羣馬入亂流泛泛若輕鳧我據黃騮鞍瑟縮不敢舒兩夫驤馬
首馬腹翼兩夫一夫提馬尾擁導相持扶驚波忽倒濺人馬互
濡濡身非弄潮兒挂腰無一壺陷阱列河底失足喪我軀迴瞻

服箱驥力鞭鞭筆俱刺史勇過茂罄控能自如戴星四五里列
炬來城隅出坎乃相賀共命投蓬樞可憐馬前卒一一豕負塗
然鐙洗鞢轡早發還登車

馬逸

勒絕蹏奔勢亦危據鞍騰伏未斜欹勞他動色誇腰腳那識書
生是健兒

無題

劉郎眷屬共天台曾覓仙源訪問來煙外羅浮忽離合雲中雞
犬費驚猜銀鉤字細教親寫金釵環懸許暗開多謝鞭龍管鳳
手繡幡還爲護花栽

蔡班卿舍人集時人書爲一卷屬題卷尾

昔賢善書者篆隸實其師立體或不同用筆無兩歧肉在筋骨

中神氣結構之瘦勁異枯瘠腴潤殊肥凝染翰雖一藝頗具萬
物姿油然入神妙元功氣淋漓學聖得近似各自成矩規醜怪
極變態不失先民遺皆由胸膈中瑩潔無瑕疵天機與逸趣故
與腕力隨可憐齷齪子學書貴毛皮文飾利達懷強附獻與義
佞柔取姿媚俗至不可醫豈無一日名勢力久則衰其人不足
稱雖工亦徒爲近尙館閣派雷同互矜推光圓雜肥濁輕佻兼
蹶痿散漫以爲靜蕩佚以爲奇唐宋數老翁冤誣莫能辭誰洗
翰墨獄焚硯埋毛錐蔡君有書癖碑搨泥牆垂參身龍蛇中熟
玩不覺疲今人亦可愛集美足相資徧乞時賢書一卷常自持
百物聚所好廬陵豈予欺諸公顏褚儔况復生同時流傳後人
手寶貴未可知

佟太恭人百歲生日忌辰爲永定河司馬

滿保作

太歲乙巳月丁亥壬辰癸卯日時在祿命相同亦偶然後生我
列諸孫輩恭人六十我始生我今四十母百齡齋心濡筆紀遺
嫗母居列宿隨長庚公昔東方擁千騎母治內政公外治夜營
大譟斬關出揭竿徧野飛旗幟閫將驕淫甲士譁誰能赤手搏
驚沙太公提筆入壁壘一軍伏地呼娘耶是時縣門胥吏鬪母
按昆鋁出綏衆孰倡邪言我刃之兀坐如山莫能動蜚語銷聲
萬戶安公乃綏轡提兵還夫人智勇足定亂文登父老今能言
澤州舊有萑苻賊飛隼入籠羈不得官人鞅掌正馳驅捕者紛
紜已羅織虎兕入柙守者憂母能縛囚防縱囚投諸陷阱不可
出牆棘未許啼鵲鵲平生兩事人爭述可入金闥董狐筆其他
庸德底須論彤管今爲存什一福命前定母有徵覲然男子嗟
無能几筵一拜堪流涕沒世之名爲母稱

通州解纜顧晴沙
侍御遣吏再送十里外
并馳詩來餞
感酬三絕句

別意河流孰短長
慨于人海遞慈航
君心更比江神急
要縮燕雲近馬當

一年纔入畫中舟
別酒留賓過石尤
他日屬君攜此榻
徐家亭子在南州

兩載南隣借綠陰
三朝退鷁伴羣禽
此心出處原無異
鶻自摩天鯁自沈

天津夜泊夢檜門先生四首

入夢精魂感重尋
臨歧老淚痛愔愔
二毛初見全家去
豈是當時種樹心

三載前牽素旆舟
瑣闥凝睇淚空流
公爲列宿光芒在
還照歸

人野岸頭

只有心喪永不除生徒會葬禮何如明年負土成公墓築室還教賜獨居

雛鳳雙栖養弱翎蕭然庭院誦遺經而今敢謂酬知己每得南音制淚聽

讀宋儒奏疏三首

眼如澄波清心如古鏡明篷窗展書讀妙趣紛然呈古來治平理一一爲權衡因時審其變治亂天人并可憐數老弱力與元功爭邪正迭消長當者成令名名成亦何益家國尋欹傾徒令百世下感喟難爲情

古人不可作簡編見其志文字雖百變忠孝旨無異和平雖慷慨情至語卽至容悅喪本心激烈懼干戾干戾亦奚惜有補職

無愧謂君不足言此念先自棄食祿但俯仰傷哉君子涕
月暈而風生礎潤而雨作機形有無間智者每斟酌事在百年
後局勢早開拓隱處方冥冥微處已躍躍盛衰倚盈虛是豈無
所著其理本自然諸賢且迂闊諱疾而忌醫何者是良藥

卽事

故人十鬢官廚酒消盡關河九月寒
振柁買花秋色滿繞牀栽菊露香團
經帷母健持觴對鄰舫人過卷幔看
更感沿途知己意數令軍吏問平安

題同年彭允初

紹升

進士秋陽軒詩卷三首

未讀神已淒讀竟心欲死哀哀孝子言天性乃如此詩人語多
僞忠孝失本旨修辭等喪志至竟何所持人子欲言者言之莫
能已一唱三歎中懷哉彭季子

季子席華盛刻苦如諸生
廷對且未冠豈曰無令名
聞道一何早曾閱同經營
閒爲咏歎詞杼柚纏綿情
本根植深厚柯條謝枯榮
識遠絕餘嗜學足含元精
時至會有爲聞修聊自貞
乃知讀書者與世原無爭

一鐙明水窗萬籟杳然寂
我誦故人詩孰聞長太息
言懷彭季子策馬度沙磧
擁鼻穹廬中古事滿胸臆
幽思托吟鞭猛氣謝鳴鏑
可念南征鴻歸隨退飛鶴

飲酒二首

古來數大事據我方寸胸
積疑孰與釋恒理皆莫通
屏之不肯去存之靡所從
愚人好自用喋喋飛螭螭
私智逞穿鑿牽合安雷同
古聖不可作謬誤難折中
瘕結漸成疾但借酒力攻
醉臥亡何鄉竊幸心空空

酒力有時盡書卷雜蕪穢束之了不觀妙悟別有會河山
浩積氣偃一蓋開我閱世眼滌此胸次隘祖懷納萬古齊物禦
百怪洒然坐終日君子則常泰

牽舟

輪囷萬斛舟突兀百丈繩牽于逆水中如蟻緣邱陵茫然負笈
者肩腹偃僂承子子飢寒軀日暄霪雨蒸噓呵邪許詞一唱羣
聲響應敝舡我何逸相習忘憫矜長繩劃然斷倒退難遽升勞者
已顛蹶逸者何所憑悟茲倚伏理庶幾爲我懲

年豐二首

河流千里下迎我讀書聲課子求先業浮家屏俗營年豐聞戒
少天暖放船輕岸闌宜新麥居人競晚耕

地僻雞豚賤汀迴斥候孤棗梨充市集堤壩立新芻抱布來田

婦攤錢醉狗屠何當風水急知向開門呼

夜闌

伏几聞雞唱披衣坐夜闌貪看一輪月忘避五更寒野籟因風
息禽禽得樹安倒身珠斗直吾欲倚闌干

四女祠

四女能爲養雙親並享年遺槐明不嫁拔宅咲成仙地志傳貞
孝鄉祠潔豆籩憐他貝州士應廢凱風篇

東昌汪蓮塘

化龍

太守招飲寄懷羅旭莊前輩二首

遣吏認橋烏鳴騶隔岸呼言瞻故人駕特啓步兵廚琴鶴陳花
底笙歌起座隅酒酣寫蘭蕙香與桂叢俱

誰與畫眞眞歌喉宛轉勻風流懷杜牧離索感汪倫粉署鳴珂
乍蘭臺走馬新寧知文字欲相對按筆人

舟中

戶牖玲瓏面面開
全家終日住樓臺
風亭月榭更番坐
水態山容轉側來
岸柳斜侵盧幌鏡
汀花閒撲晚筵杯
旁人未識天隨宅
還擬乘槎問斗魁

謁仲廟

長留浩然氣
特立子之門
禦侮諸賢遜
成人一死尊
家祠垂禩遠
餘勇至今存
忠孝兼儒將
孫吳敢並論

四十初度呈蘧翁舅氏三首

二十醉赤壁
三十泊姑蘇
奄忽又十載
拔宅浮江湖
不覺氣力衰
但惜歲月徂
始念亦淅泯
頽放安其愚
愁焉撫茲辰
零落矢與弧
顛風困危檣
淮水流舒舒
同舟六七子
絲竹相歡娛
旣進鷓鴣杓
復啓魚鰕廚
鄉語亂四座
真意同傾輸
船窗納空曠
浩

蕩來鷗鳬酒酣一攬鏡慨然成老夫

母齡五十九齒脫髮未宣兒言戒稱老何以嗟盛年敢云祿命
薄自覺氣質偏知已亦屢喪邈矣當時賢抱此一束書日對家
人眠有時課兒童孝弟爲勉旃不願去貧賤但願無尤愆春秋
奉邱墓揖讓執豆籩汝曹克勝此吾復何慕焉

有舅過者年腰腳比甥健兩郎能典謁一孫足繾綣同居歲九
易共濟時一變寒暄耳袞衣飢飽合饗膳堂前友于義頭白未
云倦劫我初度詩厚意感深眷豈無歸妹心每覺自媒賤不如
偕翁去漁釣老谿礪人生貴自知山林有餘戀

渡河

菱槌橫束水中央挂席飛馳十里黃濁浪千年沈馬璧金隄一
綫鎖淮揚劃開氣候分南朔包舉泥沙接混茫至竟河源在何

處張騫徐福恐荒唐

清江浦與監河會栗岩

日理話舊碑石圃二尹日理

既貸監河米還開上客尊人琴悲季子雲物藉招魂寡婦迎千里雙雛繼兩門憑君肩古義相對淚潛吞

後上劉行

江南江北青山繞不識誰家墓田好安人先壟在淮陰記得當時墓門道鹽河之北劉縣縣中有張公考妣碑九年再舉展墓禮扁舟小泊淮之湄督漕太保尙書老特遣材官爲除埽寒郊樂奏晉牲醴錢紙飛空散林鳥朱家土屋新壓茅男婦候門喧咲高堂前重布主賓席隨側亂開鵲鳴庖老者病者相繼死幼者壯者皆抱子主婦孀居頭漸白酬酢尊前互悲喜子孫今幸勝梨鉏能效徭役供征輸室中已無豆麥積門外每驚胥吏呼

十年人事歎屢變安人憔悴增有須昔來今去意何若可否信
宿中田廬持觴痛飲咲不答醉矣登輿泥滑滑安人已作老萊
妻偕隱之年三十八

漂母祠

婦人之仁偶然耳不過韓侯何足齒鬼神默相飯王孫齊王不
死楚王死千金之報直一錢老母廟食今猶傳丈夫簞豆形諸
色餓殍紛紛亦可憐

韓侯釣臺

太公釣致其身子陵釣全其身韓侯釣殺其身釣者死釣臺存
魚潛不深蛟龍吞三十八世姜家孫周武王如其仁

漕督清江先生招飲卽席呈教四首

久受經生業纔登通德門安和天趣滿恬澹道心存視國如家

事宜民報

主恩凌寒藉春氣盡日咲言溫

眞意儀文簡高情物我忘兒童教列侍棗栗遞相將門外軍容肅尊前絮語長開簾心迹見涼月白如霜

公餘尙勤學一榻古人情五夜吟聲朗三霄鶴唳揚家風傳蠹簡長物是鐙檠道力因文見澄觀澈底清

偕老雙喬木趨庭列玉柯琴尊留古澹花木駐春和燕寢詩書繞芸編節義多那知飛挽路轉粟效謳歌

高郵

養士安能比趙家李齊臨難自無差如何不愧科名者還有余公泰不花

沈錦章

雲

刺史席上漫成二首

畫燭清歌徹夜筵勞他舞裊太翩翩詩人老去風懷減還爲驚鴻一慨然

山抹微雲句有無藤陰醉臥倩誰扶不如消受紅妝勸一串歌喉饒社珠

露筋祠二首

朔雪炎風閃畫旗淒然一死嫂寧知此心堪並夷齊節三復東廊老米碑
香骨憑誰瘞腐餘貞魂曾否在空虛蟲聲尙作驚雷響願乞靈風一掃除

邗溝晤吳杉亭

順

家春農

宗海

雨舍人

障面來過避市塵驚聞二老客通津江湖腳跡山林臉都是燕臺舊酒人

瓜州

蟹舍漁莊碧玉環
茅簷青露隔江山
渡河而後征裘減
剗斷輕寒是此間

渡江二首

兩朵金焦八度看
乘風破浪此心關
迴舟敢避江神笑
來借漁磯著釣竿

南北東西意渺茫
欲從江左買溪堂
如何纔見鍾山影
便覺并州是故鄉

解葬

小引

幼子知讓忽云萬世之下最後死者誰其葬之予弗能答作解葬

七齡讀一經幼學已云廢每每發奇語心意別有會敏黠本性

生識解果何在通達未可知亦覺勝蒙昧盤古誰所產賢聖不能對如何慮暴露獨爲後死慨南山不可錮石椁詎云貴渴葬鬼豈知疑翁骨已潰鳶蟻理則齊算究亡者悔痛哉土親膚顙泚逐蠅蚋人子心則然達者故奚罪沉隨萬物盡旣盡便無累爾幼頗了了長成或憤憤譽兒古有癖作詩貽誠誨葬與不葬等究竟同委蛻

金陵送蓮翁舅氏還南昌五首

依依對江天各各理驚楫當時同室心豈云中道別共餐托微祿九載歷霜雪心朕冠蓋擾夢與山水接具舟載家人渺矣大川涉養疾楸石城寂莫耕餘飢寒或相待敢復聚輔頰
睥日我父出母子無所依言歸尊慈側八載意無違歲凶齧糠粃糜粥療我飢老幼曳收絮布帛裁我衣兒時解垂涕豈曰無

所知我仕二老歿欲報嗟無期

舅氏比伯叔每與先君偕豈但共憂患訓誥加童孩我旣官中
書迎養誼所該觴酒豆肉閒藉慰老母懷聚處亦云樂我病不
可排一身等風萍蓬轉無根荄

住旣無可爲去亦靡所恃早衰已漸覺茫茫感身世言就山水
窟聊且悅心志康寧母歡喜舉室拜天賜壽觴但弗罄雲物足
相娛當年讀書懷至此入游戲

南昌一椽屋可假舅氏居分我粟與帛出我甘旨餘頭白還故
鄉儒官次猶需兩弟已逾冠長者兒女俱童心當自戢志業擇
所趨資生仗何策未可仍戲渝我占解凍風挂席來相於聚久
散故難小別亦躊躕風前拔雙淚何處爲吾廬

忠雅堂文集卷十二

忠雅堂文集卷十三

詩十三

鉛山 蔣士銓 心餘

尹望山相公招飲同袁簡齋秦礪泉兩前輩席上作四首

卓午催馳問字車，軍門畫靜報休衙。
欣逢丞相開東閣，得共門生列絳紗。
釀雪天宜文字飲，素心人對歲寒花。
眞堪寫向屏風裏，未許羸官入座譁。

衙齋幽比玉堂深，十八科中四翰林。
雅集還同眞率會，虛懷彌見讀書心。
思隨泉湧詩頻和，墨帶池香帖細臨。
箕斗插檐銀燭換，清言都忘漏籤沈。

萬卷圍身老不疲，平生心事短檠知。
已收元氣歸調燮，更與斯文作總持。
胸納智珠含異彩，手扶楨幹半虬枝。
十三經本趨庭

授料得汾陽領首時

公新訂斯文精華公子十有三人

本無田里可躬耕奉母來栖白下城得到靈山纔見佛偶趨公
府亦登瀛拈花旨妙人同咲立雪門高地益清誰識寒宵方丈
裏一鐙圍聚老書生

次韻壽滌翁二首

驚嶺蓬山屢換春琪花開遍幾由旬仙翁守過庚申日詞客推
爲丙戌人十畝書堂容膝久幾番麻紙告身頻丹經注就黃
芽出讓與先生養谷神

綠蘿門外早縣興曲沼眞同賀監湖招隱誰參龐叟座授經人
盡伏生圖談深轉借賓陪主齒健翻嫌婦乳姑料理瓊林來歲
宴酒酣難却衆仙扶

喜晤袁簡齋前輩卽次見懷舊韻

未見相憐已十分江山題徧始逢君榮枯總是同岑樹舒卷俱
成入岫雲花墅留春知冷暖宰官藏影悟聲聞微輸彩裏承歡
後消受金鑪換夕熏

卜居四首

半窗紅雪一樓書廿載辛勤有此廬不肯被他猿鶴喚移家來
就北山居

鍾山眞作我家山揀得行窩靜掩關洗去六朝金粉氣展開屏
幃畫煙鬟

檐端十廟古壇遺屋後臺城壞殿基讓與爭墩兩安石家門只
傍蔣侯祠

寓公庭院四時春釀酒栽花媚我親藏過頭衙署新號雞鳴埭
下老詩人

句容道上望茅山二首

棄官成道羨茅家來往三峯鶴羽斜底事仙翁多一事去從句
漏乞丹砂

華陽洞裏寄閒身嶺上雲多自可親却怪當時強饒舌更將宰
相屬山人

自丹陽放舟赴江陰道中作

放舟呂蒙城言入毘陵道寒流疊衣帶詰屈爲循微容刁等摩
肩往復驚絕叫枯林纖欹岸牖戶冠曲隩前津指甄山一一算
鴉導

漾冰

夜風東微波鏡合寒光平篙艣割其中金鐵錚然鳴檣牙簇戈
鋌戛擊流瓊晶臥聞懼割裂凜矣臨淵情朝曦上雖遲少女不

敢爭圭稜漸滅氣薄難久凝黃河立驚濤戕戕聳邱陵千鈞
轉輪轂碾之力亦勝地軸豈欲側南北分重輕水柔冰乃剛此
理誰能明

李鶴峯侍郎龍湫觀瀑圖

公度千頃陂公才萬斛泉靈湫落眼底瀉入胸懷開公云此水
不可畫風力所到成雲煙颺輪轉側變晴雨旁散正落風迴旋
洒不到地忽飄去勢欲注壑仍屢遷游龍戲空素鸞舞意態百
出氣象千雷奔電繞萬馬驟耳目震駭銀河翻誰能曲繪無定
相神妙難到秋豪顛仙官樹羽一臨駐山靈遂以詩人傳公懷
活潑應萬事與此默契離言詮散彌卷藏未易測一芥中隱須
彌全九年時雨潤吳越秀彩拔舉無遺賢冰壺久濯智慧影香
界偶結煙霞緣昌黎以水喻文字百變不竭揚波瀾公以道力

握真宰收攝衆派歸一源亦如龍公挾湫水左右揮洒皆逢原
然松鬻瀑潑清茗咲吸靈液吞潺湲知公胸次有霖雨豈借此
水澆瓊田置身山澤會心遠羽衣游戲公其仙

冒雨獨遊秦氏寄暢園

筮屐衝泥覓靜便谿雲林雨瀉涓涓池開十畝名泉會石併羣
山遠翠連滿塢秋香掩圖畫雨朝喬木占幽偏主人廿載明光
裏騎鶴歸來定黯然

時味菴先生龍始還里

莊滋圃中丞招飲席上作二首

十年重翦夜筵鐙感舊懷人意不勝客換冰銜仍後輩天留司
寇領中丞述來恩遇頻涕想到酬知但撫膺對擁地鑢看
醉影一阿羅漢一枯僧

衙鼓隆隆侍者稀盤堆蠟淚茗香微春來座上雙龍節臣本田

開一布衣 盛世經綸能靜定書生面目自嚴威明朝長揖軍
門去敢道傳經心事違

采芝養鶴圖張吟鄉爲其亡婦蔣孺人作子族妹也甲
申小除日舟泊吳門過訪吟鄉讀弇青館悼亡詞并出
此像屬題二首

芝本延齡鶴本仙如何縹緲痛華年閨風吹去應無迹寶帳招
來自可憐嬌嬈素娥供小像細溫紅淚洒諸天消它經案繩牀
側一縷情絲裊篆煙

山抹微雲好句殊銘椒詠絮恰相俱壻爲江夏無雙士妹爾青
谿最小姑四面樓開清磬寂

南樓清曠徙倚久之
吟鄉嘗爲弇青佈也

五銖衣澹夕陽無

俸錢它日營齋奠芝長靈苗鶴帶雛

除夕梁溪道上用東坡韻

桃符身舊我何悲
毛羽雲霄本至微
十口定居仍作客
一年飄泊更懷歸
喧闐歲鼓鄉音別
錯落船鐙去艣稀
銀燭燒殘枕書臥
憐他兩僕話依依

元旦
乙酉

山何叢叢水何悠悠
繁星滿天下照我角
一荒雞亂鳴物華已
換中有旅人扣舷而歎
二太歲在酉乞糝得酒
維南有箕維北有斗
三

自京口覓篴興經龍潭過白下

江行百里餘頗憚風力阻
舍舟載籃輿斥埃粲可數
如砥拓御道蕩蕩澤行旅
驛樓新樹拱窪沼雕闌撫
空闕接閭閻塗暨到牆堵
節侯雖寒凍佳氣仍邨塢
羣峯莽迴合積鐵歲亦古
鑿石鍊粉堊破碎誰得補
鍾山勢蜿蜒掉尾入江潯
豁達開深

潭神物樂其所出入不可知靈柩闕風雨連岡遞起伏降愁
仰俯突兀見孝陵守衛存戍伍先朝遺佚事老卒尚能舉一咲
指斜陽松濤怒如虎

到家

新居如舊喜歸來椒酒重斟補壽杯序窗全家增一歲隔年相
見是初回鐙檠絳蠟參差換鏡檻紅梅向背開薄醉登樓檢書
帙出門心事漸成灰

題報恩圖二首

銜環久已咲微禽此物寧酬長者心更恐瑤環無處覓可憐人
怕受恩深

偕袁子才前輩游棲霞十五首

春風來城隅吹我出東郭言偕瀟灑人取徑度林薄蕭蕭竹樹

靜在苒帶邨落廢刻森堂皇殘碑氣昏錯功名時代移姓字風
雨剝當日公侯王九原不可作石馬臥寒煙夜深時一躍

梁碑世罕見歸然一二存劫火燒不盡文字留精魂誰銘始與
續鐵畫銀鉤痕筆力透石骨虞褚皆兒孫一幢戴橫碣反書奇
可捫腐骨瘞何處今古誰與論旣死則速朽何取祈連尊

繖山未云高遠矚了無異平疇徑縈紆度越久方至長林夾廣
術紺宇出深翠崇墉開閑閣上有栖霞字入門啓仙都臺觀虛
無闕豈惟人恂恍已出佛思議渾言懼多遺悉數愁莫暨離合
分兩戒左右歸一致視聽苟無眩竊願作詩記

西鑿十頃池顓曰彩虹鏡飛軒曳長橋水心一亭正假波赤闌
垂倒影碧峰淨青蓮可喻法已植千玉柄仰觀且無窮俯拾當
行竟過此勞躋攀前谿一僧迎

拾級梯翠微所歷卽漸高但聞松子香排立蒼虬蛟石折般若
臺石磴歧途交下瞰德雲庵古砌桃花飄奇石伏虎豹谿谷闢
深濠積水猛穿貫萬鱗翻銀濤疑在匡廬中俛覽三峽橋杳然
非人閒我欲攜漁舸

惟石稱至剛惟水稱至柔戔戔疊浪巖乃學江河流皴劈開層
波磊砢縣浮漚四海水皆立溟渤移陵邱石罅披蒙茸碧如苒
藻浮驚瀾展千丈疑有蛟龍游鱗甲苟一動銀漢不可收潮音
爾何來萬木鳴颼颼

萬松圍山房株株具奇矯皆爲千歲物造化不能槁就中九株
松形狀比人老離立爲倚藉相顧顏色好天章一顚品諸叟
益壽考拍肩倘能言晉唐事了了

登窮寺門出乃造幽居菴僧雛眉宇秀解作搖松談詩人與詠

朝不荅心自諳彌勒學道者許客來同龕佛火照深院妙諦圓
藥參寒月出桂樹下界鐘魚含侵晨倚導師北嶺爲幽探

寺東啓朱戶是爲幽居園臺榭妙不多曲廊相往還叢桂香十
株修篁綠千竿此外盡山石怪變呈奇觀凹處豁池沼立處張
屏藩沼中伏犖屹屹龜鼉誰持切玉刀界裂行波箋御
題雲片字詩句摩崖鏤空翠拂拂飛我亦南宮顛

舊園接新園萬石聚成海或爲鸞鳳窩或作虎師待或屏幃摺
鼎或洞穴沓竊茲山本磊落峭削矜碌碌昔遭泥沙瘞卓犖變
鄙猥譬諸七竅塞稍稍露頰頰豈惟失秀靈面目亦全改相公
先生妙開闢剔露出鬼鼻洗刷其罅竇積滯一朝解稜稜挺天
骨脂肉不妨醢大邦現城郭名將耀甲鎧土淨石全出嵐氣發
新采世人構亭館卷石萬錢買窄塲如可移吾將賂眞宰

北上最高峰大江落手處江南地欲浮江北山盡仰天風吹我
衣下挾萬松響壯心忽一動慨然發遐想大千局屢變六代事
已往誰求攝生藥不免埋草莽決眦送冥鴻滅沒青雲上
下山循東谿離宮接陂陀層檐曩修廊中貯陽春和涓涓白鹿
泉分溜穿巖渦決筧瀉飛瀑琴筑交鳴珂山形若紗帽漉酒誰
能搓御宿最幽靜百靈衛松蘿唯聞翰墨香彩潤飄巖阿
巍巍千佛巖巖山象能仁石亦具佛性化作千萬身一龕函一
佛閱歷幾微塵雖無劫火燒巖頭漸崩奔可憐巧匠斧難免空
王噀隋時阿育塔龍象標嶙峋何者具威力佛亦當時人我聞
無佛處亦可稱其尊

前尋紫峯閣仰挹功德水一磯承暗泉宛然飛燕子纖鱗恣游
泳碧沼清見底試流上已觴豈遜蘭亭泚乳竇味甘冽汲煮漱

玉齒斜日不下照白雲暮歸矣

東磴下已盡依然緬前院琳宮聳中央突兀師王殿返睇周遭
山勝景抱三面前開半月池虹鏡分流濺懷哉明隱君避喧匿
槃澗捨宅爲寺時榛莽依稀見巖壑有顯晦翦剔遞更變今茲
湧蓬瀛金碧傳丹絢若使眞仙游裴回亦忘倦

邀升公子似邨陳公子梅岑李大令竹溪過隨園看梅
小飲仍用前韻

池館都無一點塵濛濛魚鳥自來親看花時節閒非易招隱情
懷懶是眞久托龍眠圖雅集竟邀宋玉過東鄰紅綃綠萼皆仙
骨解勸深杯莫厭頻

什邡令胡君書巢入蜀紀行詩題後三首

蠶叢奇險入雕鏤大筆眞能挽萬牛若向詩壇拜茅土也須封

作什加侯

上界顓詩下界聽江猿
啖鳥叫冥冥淋漓墨染
千尋壁抹倒張
耶劔閣銘

羣山萬壑指螺收如展
圖經續臥游毛髮開張
看險語頭風疝
瘡一齊瘳

烏龍潭訪汪氏廢園

風潭百頃木千章一丈
荷花十頃香天入夏時
無暑到水當深
處有龍藏荒園老屋人
堪隱好友東華語最詳
謂龍藏
戊仲子豈料探尋
成瓦礫兩年中已換滄桑

隱仙庵聽鶴雛道士彈
琴並讀龔鑒戊友顓壁諸詩有

感二首

雲房蕭瑟石壇閒有客
尋幽扣竹關丹竈火溫
茶正熟羽衣人

去鶴難還神仙已化絲桐在

竺道士

弟子能詩操縵嫻徙倚中庭

雙桂樹古音盈耳借舒顏

壁上書留舊墨痕故人消息共誰論家僥田宅爲身累士解悲
歌是病恨天與高才知不死詩多奇氣定長存無因買屋居陽
羨爲爾親調藥鼎溫

陶谷看桃花

一塢寒香一嶺雲至今空谷屬徵君花開野店人爭訪酒賣斜
陽客半醺破屋簫吹吳市曲春山詩唱鮑家墳三層樓倒無通
隱風外松濤孰共聞

離別

新巢泥濕罷經營又買江船泛宅行離別紅梅向人咲歸來應
是綠陰成

江行三首

連巒覆洪瀨，積帆散頽波。驚風千里來，鼓盪蛟龍渦。挂席爭中流，擾擾知誰何。井邑冠層崖，居處人亦多。輕生涉險阻，怙懷失天和。微軀鮮寸鱗，焉敢狎江河。眎彼投綸客，鼓枻隨駕馭。逝川淹華景，含意傷蹉跎。

浮雲隱崇阿，飛雨灑遙汀。流電掣空江，乃知水氣明。萬籟各屏息，六合奔雷霆。俯仰孤艇中，每聞暗浪驚。天威遞收攝，漸有兒唳聲。迴飈或可借，戛勝同宵征。

朝曦耀廣川，溟漲含清暉。積晦歛長巒，蒼然來翠微。芳洲艸已綠，暖煙織林霏。衆鳥悅晴光，迴翔何所歸。縈想不能語，渺然悵多違。

醉言六首

莫天入空江列星勢欲脫包涵不能盡始見青冥闊春月氣微
寒娟娟起林末窺我獨坐時睂眼借開豁讀書心久死每被酒
力活所志古有命不可倖而奪失記張強懷覆杯聊一過
檢我少年詩多怨類女子斤斤計窮達所見一何鄙呼兒試讀
之秋聲滿雙耳悲歌亦何益豪俊幾回死汝曹但修身他日勿
爲此

蚩蚩句讀師立訓求富貴豈知先入言已錮畢生志豈有功與
名利欲汨神智可憐思得失所爲復何忌身名終敗裂有學益
滋累煌煌聖賢業浩浩古今事所以教兒童當存周孔思

古人書亦多讀者自得之憫彼寸光眼分門各宗師聖賢亦有
徒何取諸愚癡謬妄只自戕先覺恕無知焚書豈無見六籍終
存遺

游藝屬餘事通儒無不能用之廟堂上鉅細皆克勝取少而積
多寬裕歌同升俗士竊章句驟貴亦自矜國家數大事何以爲
肩承兵刑錢穀間茫然日兢兢仕優不遺學沒世將何稱少賤
歲月寬慎勿悲填膺

既醉語不擇每作無稽談妄言或蒙恕迷罔我已酣我本不識
字所論只自慙邨雞叫喔喔斗直星河參江水手可挹飲之味
清甘褊心塵垢多洗滌一再三庶幾生智慧不復終愚慙

讀史二首

我讀唐虞書命官各有專子孫世厥職家學承其先一事不易
任兼攝何能全後來分途科借求天下賢人各有不能忝竊眞
強顏不學而備位倉卒難免旃黠吏上下手每每操微權宋明
兵戈際用人尤可憐一將當八面調遣如循環人才一何少庸

豎蝨其間豈無遮世翁山中掩柴關斧斤既莫及朽爛同曲拳
只令論世者讀史興長歎

清時恥貧賤致身惟恐後乃知

聖明朝隱逸不必有繫辭遜蠱開亂世爲亦偶求達遊終南何
異自媒醜錮疾沈煙霞有無不足取數微不肯起所挾豈眞厚
鳳雛禽獸耳感德現郊藪

文字四首

心與文字會飄飄起春雲又如春江流波濶了無痕篇成覺微
妙其故亦難云改念谿逕別再爲工拙分平時讀精力醞釀卽
漸醇此境不易到可爲知者論著作有時運何況樹功勳
巍巍淮西碑中有萬丈光君相力難掩天地舒其芒蘓文入厲
禁厄盡久益昌後生學操觚汲汲恐弗章剽賊浮泛詞竊譽豈

能長其言本無根又婆奚足傷

熟精文選理少陵亦有言豈謂摭浮艷詡詡華藻閑奧義究何在讀者多茫然摘獵什百字僻詭矜雕鐫複贅雜腐晦拗澁兼拘牽讀之了不快自詫千秋傳嗚呼六朝人何處明誣冤

文章本性情不在面目同李杜韓歐蘇異曲原同工君子各有真流露字句中氣質出天稟旨趣根心胸誦書見其人如對諸老翁後賢傍門戶摹仿優孟容本非偉達士真氣豈能充各聚無識徒奉教相推崇之子強我讀一卷不克終先生何許人細繹仍空空

辨詩

唐宋皆偉人各成一代詩變出不得已運會實迫之格調苟沿襲焉用雷同詞宋人生唐後開闢真難爲一代只數人餘子故

多疵敦厚旨則同忠孝無改移元明不能變非僅氣力衰能事
有止境極詣難角奇奈何愚賤子唐宋分籓籬哆口崇唐音羊
質冒虎皮習爲廓落語死氣蒸伏屍撐架陳氣象桎梏立威儀
可憐餒敗物欲代郊廟犧使爲蘇黃僕終日當鞭笞七子推王
李不免貽笑嗤況設土木形浪擬神仙姿李杜若生晚亦自易
矩規寄言善學者唐宋皆吾師

春雪

龍公試手翦霜毛恰共春霖澗土膏但入田疇滋黍稷草歸江
海助洩瀉危峯暫失青千仞溷渚旋添綠半篙欲敵新寒借邨
酒算天空闊一漁舸

皖口謁余忠宣公祠二首

十載重瞻廟像真同龜相敬故如賓一塘清水澄千古三劔香

泥葬六人食祿敢存能死念臨危纔見讀書身江濤氣靜靈旌
閃天馬邊旁有畫輪

雨歇空江濕霧沈特攜妻子一登臨乾坤空闕巖疆小烽火高
寒古殿陰徒倚暫舒行役眼蒼茫同見古人心殘碑再讀何關
涉不禁潸然下拜深

極目二首

江山奇勝總偏安天塹茫茫固守難史冊事隨春夢過皖公青
入酒杯看

雙姑秀色接金焦磯石攔江露一椒萬壑千巖苦收束讓他中
抗海門潮

讀荆公集二首

事業施行與志違當時得失咎何歸更張治國求強富錯誤隨

人著刺譏立法至今難盡改存心復古豈全非終身刻苦無知已文字誰參意旨微

定林酣睡半山游豈是江南隱逸流學術偶偏誰曲諒功名難遂自懷憂得君許用匡時策言利非同爲已謀商鞅宏羊何足責由來賢者繫春秋

顓荊公集後二首

許國知人事本難豺狼反噬可心寒憐他一代斯文友說到功名白眼看

千鈞筆力氣嶙峋一代文章侍從臣却怪當時校卜錯從來相業怨庸人

讀昌黎詩

巖巖氣象雜悲歌浩氣難平未肯磨自古風騷皆鬱勃人生不

得意時多

讀宋人論新法劄子

三代而還不可爲漢唐刑措且難期羣黎福薄人焉救累葉財
空運久虧本欲鍼刀蘊痼疾誰知藥石付庸醫後來十九遵遺
法功罪如何請細思

小姑山下見鴛鴦

第一故鄉山江煙擁髻鬟波濤莽迴合竹樹白蕭閒古廟羣龍
拜扁舟十口還鴛鴦最恩愛同宿水雲間

湖口縣二首

江水平分處湖光繞縣門磯迴漁艇聚沙淺釣臺尊古壁添新
翠春流驗舊痕巖風弄鐘響疑有暗鯨吞

列岫鬱蒼蒼鸞環挂女牆煙波接彭蠡門戶鎖南唐地入魚鰈

市天隣橘柚鄉迴頭看湖水一半下潯陽

大孤

凌空留直性立脚見孤根不黨規模正無依氣象尊六鼇扶地
軸一塔語天門幸有前峰在中流托弟昆

望廬山積雪

九疊玉屏張晶瑩接混茫際天迴暝色返照山寒光凍蟬翻銀
瀑飛鴻散石梁臨風懷酒客頭白坐書堂

讀晉書四首

隱囊玉麈閒粉澤尚文雅不知廟堂中誰爲謀國者太平幸無
事盛氣不相下新亭流涕時夷晉毋乃寡

羊公讓開府歉然以爲媿侃侃薦三人不敢竊高位未達冬勝
臣賢路宜早避謝石彼何人襄墨乃其諡

當時浮華士咲輕王景略去隱華陰山飄然若孤鶴桓溫不可
並苻堅聊且托賢哲生亂世通顯等流落勿謂燕無人猶有慕
容恪

儒素爲古拙詞賦爲君子卓哉李士恢議論乃及此義不關勸
懲相尚入奇詭齊梁亡國音風教日淪委作俑始何人嗚呼操
與丕

落星墩

星隕遂爲石其理夫如何落者不復上繫天恐無多但見大星
落不見大星生名將果何物誰見來蒼冥蟲魚雜鳥獸列宿二
十八不信土蝨精機聲弄伊軋盜賊應天象水旱移星躔斗南
箕尾人大抵想當然

詠懷二首

勝引不可卽深衷見良難每託古人意一唯再三歎我愛亦何
繫中夜慘不歡起攬將敝裘一禦江湖寒崩風徒哀壑猛雨驅
驚湍默坐不能語寂寂摧肺肝

浮家溯江湖涉川亦云屢春雲起天表下有先人墓錯迕紛世
緣故鄉不得住去官失微祿飢色漸如故積隱未易明疑者或
多誤默念孤生桐萌芽托誰護

懷袁叔論二首

春飢聲裏念冥鴻俯仰寬閒一畝宮海內幾人成達者山中七
載作詩翁性靈獨到刪常語比興兼存見國風辭却冀黃就陶
謝卅年心事漸消融

平生心折友兼師初服言歸媿已遲招隱無書寧見絕登臨有
賦定相思桐鄉愛慕存生祭綿載威儀託見知老向柴荆嚼冰

雪賞音端合付佳兒

左蠡

異哉漁家兒乃欲作天子用兵亦如神敗則爲寇耳艸木鱗介
儔效靈各有以義士廿六人先後得其死十廟起鍾山功臣盡
誅矣

樵舍

朝建大將旗禽賊蕪廬下算坐九華山蕭然學道者功名處危
懼性地益瀟洒危哉兒戲朝名器咲相假朝廷豈無人朽國一
司馬西南盜從橫剪削賴儒雅流連極荒淫憑誰扶大厦十丈
匡廬屋淋漓自揮寫

次韻荅武寧盛秀才二首

修竹爲子身纖瘦挺而逸下筆鳴朱絃鏗然中徐疾萬籟各有

聲子獨語其適乃知靜者言食氣自胎息掩關聽苦雨不若鼃
鼃出驚雷一繞柱稍藉破沈鬱時枉後生駕子學與衆別如何
讀書眼瞭瞭若明月

繾綣對之子黯慘思尊人

于明先生

昔有河梁別遂作幽明分傷哉

大雅才不入鄒枚羣布衣抱六籍泉石甘沈淪釋我矜憊氣襲
襲吹蘭芬入世廢然返心志悲煩紛雛鳳鳴高梧清響欣重聞
子能起吾衰奚啻翁長存

次韻荅汪雲谷秀才

平生幽恨古今積半夜歌聲風雨驚但借文章敵憂患莫看科
第作功名淚多豈必臨歧下感雜眞憐逐字生讀罷君詩燈火
滅我心終久一光明

辨命篇貽揭生

二氣運五行兩曜領羣星萬物產其中恒沙相滅生賦稟適與
值豈復能將迎造化任厥勞苦爲持權衡富貴貧賤之瑣屑煩
冥冥察察降禍福恐傷冥宰明我身非稷契本不關重輕偶參
萬彙閒倏忽委骸形無德竊高位糜祿負虛聲縱免世俗責終
懼干雷霆我生四十年喜赴鷗鷺盟待盡豈不樂遑計軒冕榮
揭生讀書者抑塞困一經偶開談天口默識誰公卿其言亦多
驗叩者來充庭所得不償勞頗覺困憊并辨士風塵中賢愚各
經營但爲利達謀時被寵辱驚子術善推測孰是列星精孰抱
用世才孰立不朽名千百有什一庶幾

聖朝英惠吉而逆凶理數嘗代更幸語蚩蚩士福命休強爭

市人鬻紅鶴詩翻刻本子石蘭購一本與思慧并成三
絕句見示讀竟愴然次韻志其事三首

鶴返仙源術莫追棠梨一樹殞宮雉誰翻副本街頭賣三百青
錢兩卷詩

彈指浮生信有涯自來無命屬多才六年欠爾招魂賦怕惹秋
墳鬼哭來

空將遺艸委街塵萬幻何曾有一真阿姊買詩嬌女校可憐愁
煞序詩人

射鹿圖

讀書射獵過生平攬鏡披圖亦可驚乞我黃顰三斗血爲君重
唱少年行

謝蒼厓丈西堂小飲次韻六首

別去紛離緒歸來倚至情愁多詩漫與歡動酒先呈壁畫塵難
掩檐花架尚擎深杯對斟酌細向雨中傾

引退窺微理追歡惜寸陰誰兼才學識幾閱去來今力薄防恩重官貧得累深如何泉石叟亦動絕交心

穿墉勞雀鼠布策悟天人衛足輸藝巧除疴倚艾神舊巢鳩占半華屋燕窺頻不與浮雲競知翁嬾是真

老去仍豪俠黃金散不歸碎琴心已淡說劍興猶飛蜂趁殘芳亂螢爭腐艸微巡檐觀物理筇杖獨依依

書摹乞米帖人喜閉門居醉後爲狂耳飢來每宴如留賓申繾綣作達減歎歎我亦長貧者初迴墨翟車

翁歌招隱曲我脫進賢冠髮已星星變書猶細細看誰憐十年仕尚少一枝安棋局平非易中心莫再彈

贖屋

時蓬廬舅氏新歸無屋贖以假之

典宅具舟當日事傾囊贖屋此時心寬宜舅氏全家住僻慮東

湖淺漲侵碧井長開窗底鏡老樟仍落巷南陰爲翁門榜題安樂三匝無須更繞林

贖老屋

祖遺百年屋結構樟以南昔貯萬竿竹花木喬天參地廣屋不多南東向猶兼卅載邁中落離散誰能監家貧力難守典質一再三傳舍歸強隣視者環而耽我歸越門巷憑式憂心悵爾貨以贖之一洗先人慙逡巡入故巢頽敝誠何堪剪伐失嘉蔭風雨摧層檐補葺具塗塈拮据持危貼敬潔西三楹中設祖考龕二十四栗主九格分藏函聚處安先靈簡陋祈弗嫌蠲吉肅遵豆齋沐先期嚴質明率家人禮意俱能諳承祀爲世守受福繩繩覃北堂兄嫂居生長宜兒男古井依庖廚泉清味芳廿新婦試朝汲底不勞餅飭綽楔表衡門稍冀殊閭閻豈爭鄉里榮或

免強豪貪子心自綿邈達者嗤愚愁析薪如之何竊願兒曹擔

瑞洪鎮奉太安人展外祖考妣墓

十年一度牲醪獻二老千秋鑒格存感極欲招雙鶴語官微難
荅九原恩平生盛德傳間史他日

皇宣表墓門六十慈親同孺慕霞裾來拜尚聲吞

題林雅成

有彬

詩後並寄平園同年

有席

明府

妙譽稱難弟清才說小林廿年鍵戶客千古讀書心比歲流亡
集諸生智慮深歌詩崇大雅樂府嗣遺音畫壁詩留史朱絃操
入琴羣公登衮袞一劒走駸駸風雨牀堪對關河感不禁學常
憂閒斷迹未計升沈經世功難見名山業自任人看逢掖貴爾
抱璞函琛久躡湘東履頻題漢上襟離思紛已極嘉會喜重尋
問訊分行雁傷嗟失乳禽喪應讀祭禮官不媿慈箴鏡具齋猶

緩齋廚突未黔霉痕衣彩漬霜點鬢絲侵鷁翩眞成退鱗豪已
罷簪朋權蛩負駢交義芥投針泛宅終懷土披裘實賤金誰能
振毛羽只自笑蹄涔渺爾雲分岫懷哉樹共岑檐花落如雨何
日酒同斟